

UMP tingkat kecekapan dengan memperkemas pentadbiran dan pengurusan



Pekan, 6 Disember- Seramai 100 orang staf Universiti Malaysia Pahang (UMP) dalam dari pelbagai jabatan berkumpul dalam Program Agenda Transformasi Pengurusan dan Pentadbiran 2.0 Siri 1 (ATTP) bagi membincangkan isu berkaitan pengurusan dan pentadbiran dalam bengkel anjuran Jabatan Hal Ehwal Korporat dan Pengurusan Kualiti (JHKK) yang berlangsung dalam Dewan Bankuet Canseleri Tun Abdul Razak di UMP Pekan.

Dalam program ini sebanyak 82 isu dikenalpasti hasil beberapa siri bengkel yang diadakan melibatkan permasalahan berkaitan sumber manusia, kewangan, akademik, ICT, imej universiti, pengurusan logistik, pelajar dan kepimpinan, kebijakan staf dan lain-lain.

Menurut Naib Canselor UMP, Profesor Dato' Ts. Dr. Daing Nasir Ibrahim berkata, program ini adalah kesinambungan daripada bengkel yang pertama dijalankan pada tahun 2008. Setelah beberapa tahun berlalu, keadaan persekitaran kini memerlukan sistem pentadbiran yang boleh diubahsuai untuk meningkatkan kecekapan dalam pengurusan.

"Keperluan kepada inovasi dan sesi perbincangan perlu diadakan dalam menambah baik supaya menyakinkan pelan strategik yang akan kita lakukan nanti. Ini adalah fasa pertama dan akan dibengkelkan untuk tambah baik dengan melihat kepada perspektif yang baharu," katanya dalam menyampaikan aluan semasa program berlangsung.



Tambah beliau, usaha ini juga menjadikan budaya kecemerlangan diterapkan dalam pengurusan dan pentadbiran di universiti ini. Ianya juga dapat mengenalpasti permasalahan yang wujud di peringkat operasi dalam usaha mengelakkan berlakunya gangguan terhadap kelancaran pelaksanaan Pelan Strategik UMP.

Sementara itu, Penolong Naib Canselor (Hal Ehwal Korporat dan Kualiti), Profesor Dato' Dr. Ishak Ismail berkata, segala keberhasilan daripada bengkel ini akan dibentangkan kepada pihak pengurusan universiti untuk dinilai dan diambil tindakan selanjutnya. Sepanjang perbincangan juga beberapa perkara diambil kira melibatkan inovasi, kreativiti, meningkatkan produktiviti, mengurangkan kos dan meningkatkan sistem penyampaian. Selain itu juga dengan hasil penemuan baharu ini juga dapat mencari jalan menghasilkan produk atau perkhidmatan yang lebih baik.

Disediakan Bahagian Komunikasi Korporat PNC

Posted By : NORHIDAYAH BINTI MOHAMAD Date Posted : 07-12-2017, 10:43:49